

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
JU PREDŠKOLSKI ODGOJ I OBRAZOVANJE ZENICA
UPRAVNI ODBOR
Broj: 06-0602-574/1-2025
Zenica, 14.04.2025. godine

Na osnovu člana 40. Zakona o predškolskom odgoju i obrazovanju ZDK ("Službene novine ZDK", broj: 7/10 i i 8/12) i člana 48. tačka 18. Pravila JU Predškolski odgoj i obrazovanje Zenica, privremeni Upravni odbor Javne ustanove Predškolski odgoj i obrazovanje Zenica na 8. redovnoj sjednici donosi

ODLUKU
o ocjeni rada direktora za 2024. godinu

Član 1.

Rad direktora JU Predškolski odgoj i obrazovanje Zenica ocjenjuje se „ne zadovoljava“.

Član 2.

Odluka stupa na snagu danom donošenja.

Obrazloženje

Odlukom o razrješenju direktora JU Predškolski odgoj i obrazovanje Zenica privremenog Upravnog odbora broj: 06-0602-1167/1-2024 od 18.12.2024. godine utvrđeno je sljedeće:

Uvidom u dokumentaciju vezanu za upis i prijem djece u Ustanovi privremeni Upravni odbor je utvrdio da u Ustanovi prilikom zaprimanja zahtjeva za upis djece nije vođena evidencija na način propisan Uredbom o kancelarijskom poslovanju organa uprave i službi za upravu u Federaciji BiH („Službene novine“ Federacije BiH, broj:20/98), što je u konačnici dovelo do toga da prijem djece u Ustanovu bude protivan članu 4. stav (3) Pravilnika o prijemu i boravku djece u Javnoj ustanovi Predškolski odgoj i obrazovanje Zenica broj: 06-0602-61/1-2022 od 10.02.2022. godine, te navedenim postupanjem nije mogla biti sačinjena ni validna Lista čekanja, na osnovu koje bi se i vršio prijem djece. Izbjegavanjem vođenja evidencije koja je propisana u dijelu zaprimanja zahtjeva za upis i prijem djece, direktorica Ustanove je omogućila prijem djece na način koji je pristrasan i netransparentan, odnosno suprotan navedenim propisima.

Uvidom u dokumentaciju vezanu za popunjenosti odgojno-obrazovnih grupa u vrtićima privremeni Upravni odbor je nedvojbeno utvrdio kršenje pedagoških standarda od strane direktora Ustanove. Navedeno nepoštivanje pedagoških standarda privremeni Upravni odbor smatra nesavjesnim i nemarnim vršenjem dužnosti direktora, pri čemu poseban akcenat stavlja na činjenicu da se Ustanova u proteklom periodu suočila sa velikim nedostatkom kadra zbog odlaska istog u penziju i čestih bolovanja radnika. te iz tog razloga dodatno smatra neprihvatljivim formiranje odgojno-obrazovnih grupa sa brojem djece većim od dozvoljenog.

Analizirajući dokumentaciju vezanu za isplate stimulacija, nagrada i ostalih sporednih neobaveznih naknada, kao i isplata naknada za prekovremeni rad radnicima Ustanove privremeni Upravni odbor utvrdio je niz nepravilnosti kod isplate naknada po osnovu radnog učinka, odnosno naknada za povećan obim posla i naknada za prekovremeni rad. Sve navedeno u konačnici je potvrđeno i od strane sudskog vještaka ekonomske struke koji je Ustanovi dostavio Nalaz i mišljenjem o obračunu plate i dodatka za platu za radnike JU Predškolski odgoj i obrazovanje Zenica.

Nepravilnim evidentiranjem radnog vremena radnika prekršen je i član 8. Pravilnika o načinu vođenja evidencije o radnicima i drugim licima angažovanim na radu („Službene novine Federacije BiH“, broj: 92/16) s obzirom da se u dokumentaciji koju je direktorica Ustanove dostavila privremenom Upravnom odboru nalaze dokumenti koji su u suprotnosti jedan sa drugim, odnosno dovode do mogućih zloupotreba prava radnika.

Privremeni Upravni je nesporno utvrdio da je direktorica Ustanove tokom perioda maj – oktobar 2024.godine, isplate naknada po osnovu prekovremenih sati radnicima vršila protivno aktima Ustanove, a iste je odobravalala protivno Instrukciji Osnivača, i za iste nije tražila potrebne saglasnosti Osnivača.

Uvidom u dokumentaciju vezanu za odobreno neplaćeno odsustvo odgajateljice privremeni Upravni odbor utvrdio da je neplaćeno odsustvo odobreno suprotno dostavljenoj dokumentaciji i suprotno članu 67. stav (1) tačka a) Pravilnika o radu Ustanove.

Naime, Rješenjem o neplaćenom odsustvu odobreno je odsustvo sa rada bez naknade plaće u trajanju od 12 mjeseci, a zbog stručnog usavršavanja, istraživačkog rada iz oblasti specijalne pedagogije „Inkluzija u vrtićima u Njemačkoj i Bosni i Hercegovini“, koje će se sprovesti na području Stuttgarta u Njemačkoj.

Iz priložene dokumentacije utvrđeno je da se stručno usavršavanje neće provoditi u inozemstvu, već na području BiH, te da će stručno usavršavanje odgajateljice trajati 3 godine, i da imenovana u periodu od 12 mjeseci neće završiti započeto stručno usavršavanje, iz čega se jasno izveo zaključak da Ustanova nakon perioda od 12 mjeseci neće imati pozitivan učinak odobrenog neplaćenog odsustva radi stručnog usavršavanja.


Privremeni Upravni odbor smatra da je direktorica Ustanove prekršila gore navedene odredbe Pravilnika o radu Ustanove iz razloga što se u periodu donošenja predmetnog rješenja Ustanova suočavala sa velikim nedostatkom stručnog kadra, odnosno nedostatkom ukupno sedam odgajatelja, s obzirom na prethodno penzionisanje stručnih radnika, te bolovanja na duži vremenski period dvije stručne radnice. U skladu sa navedenim da se zaključiti da se neplaćeno odsustvo odgajateljice nije moglo realizovati bez većeg opterećenja ostalih radnika.

Članom 59. stav (1) alineja 3. Pravila Ustanove propisano je da Upravni odbor predškolske ustanove može razriješiti dužnosti direktora predškolske ustanove prije isteka mandata na koji je imenovan, ako svojim radom teže povrijedi propise koji se odnose na rad predškolske ustanove, njenu djelatnost, pravila ili neki drugi opći akt.

Kako je privremeni Upravni odbor nesporno utvrdio nepravilnosti pri prijemu djece u Ustanovu, nepravilnosti u postupku popunjavanja odgojno-obrazovnih grupa u vrtićima Ustanove, nepravilnosti pri isplati dijela plaće po osnovu radnog učinka i isplate naknade za prekovremeni rad, nepravilnosti pri odlučivanju o neplaćenom odsustvu, to je direktorica Ustanove izvršila povredu Zakona o radu, povredu Pravila Ustanove, povredu Pravilnika o radu Javne ustanove Predškolski odgoj i obrazovanje Zenica, povredu Uredbe o kancelarijskom poslovanju organa uprave i službi za upravu u Federaciji BiH, povredu Pedagoških standarda i normativa za predškolski odgoj i obrazovanje, povredu Pravilnika o načinu vođenja evidencije o radnicima i drugim licima angažovanim na radu i povredu Instrukcije Osnivača.

Na osnovu izloženog odlučeno je kao u članu 1. ove Odluke.

Predsjednica privremenog Upravnog odbora:



Alma Ščetić
Alma Ščetić

Dostavljeno:

- 1 x Osnivač
- 1 x direktor
- 1 x a/a